

Et ass Zäit, fir sech nees em all Patient ze këmmere

Pressematdeelung vum 22. Abrëll 2020

Déi éischt dréngend Mesuren, déi fir d'Corona-Epidemie geholl gi sinn, ware logescherweis op dee Krankheetserreger konzentréiert. Et ass - besonnesch am Gesondheitssecteur - net genuch un d'Besoinen vu Kranke geduecht ginn, déi schon a Behandlung waren oder eng Behandlung fir e gesondheetleche Problem gebraucht hätten, deen net un de Corona-Virus gebonnen ass.

D'ADR verlaangt, datt déi medezinesch Grondversuergung esou wuel bei Generaliste wéi bei Spezialisten nees hiergestallt gëtt. Mat deenen néidege Sécherheetsprozeduren ass et méiglech, déi medezinesch Noutfallsituatioun ze beendegen.

D'Corona-Kris huet awer ganz séier gewisen, datt et onméiglech ass, de ganze Secteur vun der Gesondheet wéinst enger Viruserkrankung zouzemaachen. Dat geet zu Laaschte vum medezineschen Zerwiss fir Leit, déi reegelméisseg an Dokteschkontroll musse goen. Leit, déi zum Beispill Zännprothesen ugepasst kréien, gehéieren och zu de Leidtragenden, well si provisoersch oder net richtig agestallten Apparater hunn a keen Zänn Dokter, deen nach eng Kéier géing duerno kucken.

Et gëtt och ganz vill medezinesch Beruffer, wou d'Teleediagnos einfach net méiglech ass (Psychologen a Psychiater, fir nëmmen déi ze nennen). A fir vill Kranker ass de Kontakt mam Dokter vun hirem Vertrauen esou wichteg, datt eng Noutfallhëllef am Spidol fir si kaum a Fro kënn. Och hei musse Leit, déi Hëllef brauchen, nees e normalen Zougang zur medezinescher Versuergung kréien.

Eng Normaliséierung vum medezinesche Secteur, natierlech ënnert deenen néidege Sécherheetsprozeduren, bei deenen d'Ustiechungsgefor fir de Patient wéi fir den Dokter esou wäit wéi méiglech ausgeschloss ass, muss zum aktuellen Zäitpunkt méiglech sinn. Dat wär och e Wee, fir d'finanziell Hëllef fir dës Beruffer nees zeréckfueren ze kënnen.

Den Exit ass eng Normaliséierung, awer eng Normaliséierung an e Liewe mam Corona-Virus. Duerfir muss och elo Schluss sinn dermat, de Leit Angscht ze maachen, esou datt si sech net méi bei hir Dokter trauen a sech fir laang Zäit an hirer Wunneng verschanzen. Normaliséierung ass och méi Beweegungsfräiheet, ëmmer ënnert de néidege Sécherheetsmoosnamen.

D'ADR seet: Gitt de Patienten an den Dokter hir medezinesch Autonomie elo erëm.